

## ■ Mit de Witschers unnerwags – immer wieder schie!

Is söll schu wieder blitzn un donnern! Des war doch schu mol im vorign Monat!

När Mut un Zuvorsicht, de Witscher - Pfarle ham kaa Angst. Vielleicht ziehst ja aa an uns vorbei? Diesmol hat mor de Denise kaane Ep vun den Watterdienst geschickt, iech hobs aber in mein Händi salberst gesaah, desis dorwagn eweng ubeständich bis sunstewos warn kaa.

Aber zen Treffpunkt um Viere war allis Bestns. Jeder hat nen Zettl vu unnern Chef kricht, wu de Wogn-Nummer un aa de vürbestellte Asse-rei drauf stand, esu wurn alle dorinnert, wos se siech vornewag ausgesucht ham. Ja, bei uns herrscht Ordnung!

Gelei sei de Pfaarle aa schu lusgetrapplt, erscht eweng of de Nabnstroßn, aber dann of dor Hauptstroß, do ham mir ne klaane Schlang Autole hinner uns hargezugn, besonnersch, eh mor zen Gerschnbarg eigebugn sei. Des leßt siech nu mol net vormeidn, do missn die Fahrer halt durch.

Unner Rundraas im unnern Barg wurd mit allerhand Getränke dor vorschiednstn Art unnerstutzt, jeds hat irngdwos in de Mitt of de Kutschentischle gestellt un is wurd kräftich eigeschenkt – su guts halt gieht bei den Gewackl. Gut, des de Witschers vürgesorcht un in de Tischle genuch Löchle eigericht ham, des de Trinkbacher net aa noch imharrutschn.

Bein erscht Halt – do wu mor de Staumauer vu unnerner Tolsperr am bestn saah kaa – kunnt mir siech de Baa emol vortraatn. Oder aber aa emol nein Wald vorschwindn, ihr wisst bestimmt warim des nu mol sei muss. Vu weitm tats aa schu mol blitzn un donnern un aa e paar aanzlne Tröpple kaame schu mol vu ubn har runner. Dann gings aa schu wetter un dor nächste Halt war aafach Pflicht: do wurd dor Steichermarsch gesunge. Dodorzu mußtn 2 Gunge, dor Dschastin un unner Enkl Alexandor, mit aller Kraft an den Hunt ringsrim drehe – de ganzn Strofn lang!

Alle standn brav ringsrim un ham kräftich eigestimmt in unnere Hümne! Schnell noch e paar Bildle geschossn an dare schenn gemoldn Wand mit de Durchgucklöschle for de Köpp.

Inzwischn wars aber aa noch finstere wurn am Himml. Do hieß is: nauf of de Wägn un straff dor Muldnhammerstroß noch Eimstock nauf! Un do hatts dann aa kräftich geschitt, wos dor Himml har gabn hat. Is hat nicht genitzt – ubn vor de Schrebergärtn muß mor halt oosteign un zen Jürgen sein Gaststiebl renne. E paar weniche, die kenn Regenschirm dorbei hattn, die sei halt ball zen ausringe nass wurn. Aber alle sei bei den wässrichn Spass gut aakomme.

E schiens Maadl hat uns mit de Getränke vorsorcht un dor Jürgen hat de bestelltn Assn dor Reih nooch aufgetrogn. Wie immer is viel dorzählt wurn, denn vun letztm Traff im vorign Monat bis itze gabs ja wieder viel ze beredn un auszetratschn, su is des nu mol in nor schenn Gemeinschaft! Später hamzu sei einiche gefahrn wurn, aber is Watter hat siech inzwischn aa wieder beruhicht.

*Bis zen nächstn Bericht aus unnern haamatlichn Voreinslabn – eier Schmidti*

